

**Ni Presidente
Dieter F. Uchtdorf**

Maikadua a Mammagbaga iti
Umuna a Pangulu



Maysa a Natibker ti Pannakailansadna nga Angkla

Di pay unay nabayag naaddaanak iti gundaway a makalugan iti dakkell a bapor a nagdaliasat iti nakakaskasdaaw a baybay ti Alaska, USA. Bayat ti panagsagana ti kapitan para iti agpatnag a panagtalinaed ti bapor iti adayo a nasin-aw a baybay, siaannad daytoy a nangamiris iti lokasion ken dagiti kasasaad, kas iti panaglinak ken panagatab ti danum, ti kaadalem ti danum, ken ti distansia manipud kadagiti napeggad a lapped. Idi napennekna, intinnagna ti angkla tapno agtalinaed a natalged ken naintek ti pannakaangkla ti bapor, a mangpalugod kadagiti pasahero a maaddaan iti gundaway a mangbuya iti pagsidsiddaawan a kinapintas dagiti pinarsua ti Dios.

Bayat ikikitak iti baybay, nadlawko a kasla mayan-anud ti bapor iti apagapaman a pigsa ti angin ken agos ti danum iti baba. Nupay kasta, nagtalinaed a naintek ken saan a mayadayo ti bapor iti espasio a masaknapan ti kaatiddog ti singdan ti angkla ken ti tibker ti angkla.

Saan nga indulin ti kapitan ti angkla ti bapor tapno sidadaan daytoy a maibaba laeng no dumteng ti bagyo. Saan, inangklaanna ti bapor kas maysa a panglap-ped a wagas ken sinaluadanna ti bapor manipud iti

panaggaraw nga agturong kadagiti saan a natalged a danum wenno siiinnayad a pannakayanud bayat ti panakarikna dagiti pasahero ken tripulante a nasaluadda.

Bayat ti panangpampanunotko iti daytoy a kasasaad, napasamak kaniak a no saan a gundaway daytoy para iti maysa a pangngarig, iti kaano man diak koma nakapagpatayab iti eroplano.

Apay a Kasapulantayo dagiti Angkla

Ti usar ti angkla ket mangpatalinaed iti bapor a natalged ken nasimbeng iti tinarigagayan a lokasion wenno tumulong a mangkontrol iti bapor kabayatan ti dakes a panawen. Nupay kasta, tapno maipatungpal dagitoy napapateg a panggep, saan nga umdas ti maaddaan laeng iti angkla. Nasken a ti angkla ket solido, mapagpannuran, ken mausar a mayannatup iti umno a panawen ken lugar.

Agkasapulan met ti tuggal tao ken familia kadagiti angkla.

Dumteng ti panagrigat a kas maysa a bagyo a mangiwawa kadatayo ken mangipalladaw kadatayo iti kabatuan. Ngem no dadduma agpeggaditayo met no ti amin

ket makita a natalged—natalinaay ti angin ken nalinak ti danum. Kinapudnona, mabalin nga addatayo iti kadakkelan a peggad no mayan-anudtayo ken bassit unay ti panaggaraw ta saantayo a madmadlaw daytoy.

Ti Ebanghelio ket Isu ti Angklatayo

Dagiti angkla ket nasken a solido, nalagda, ken mapagtalinaed a nasayaat tapno nakasagana no kasapul-an dagitoy. Mainayon pay, nasken a maisilpoda iti pundasion a makabael iti dagsen dagiti agsusupanget a puersa.

Kinaagpaysona, ti ebanghelio ni Jesucristo ket maysa nga angkla. Insagana daytoy ti Namarsua ti lubong para iti nadiosan a panggep ken naisangrat a mangted iti pannalaknib ken pannarabay kadagiti annakna.

Kangrunaanna, ania ti ebanghelio, malaksid ti plano ti Dios a mangsubbot kadagiti annakna ken mangisubli kadakuada iti imatangna?

Iti pannakaammo a gagangay iti amin a banag ti mayanud, nasken a sititibker nga ilansadtayo dagiti angklatayo iti tukot ti kinapudno ti ebanghelio. Nasken a silalag-anda a maibaba kadagiti darat ti kinatangig wenno apagdapadap iti rabaw dagiti panggeddengtayo.

Iti daytoy a bulan naaddaankami iti gundaway a dumngeg kadagiti katulongan ti Dios iti maysa a sapasap a komperensia ti Simbaan. Dagiti balikasda, a naikappeng kadagiti nasantuan a kasuratan ken pannignay ti Espiritu ket nangted iti pammatalged ken natibker a pundasion dagiti agnanayon nga ik-ikkan-pateg ken pagbatayan a mabalintayo a pangisilpuan kadagiti angklatayo tapno makapagtalinaedtayo a natibker ken natalged iti baet dagiti panagkagumaan ken pannubok ti biag.

Insuro ti nagkauna a propeta Helaman, “Babaento ti bato ti Mannubbottayo, nga isu ni Cristo, ti Anak ti Dios, a nasken a bangonenyo ti pamuonyo; tapno no yeg ti sairo ti nabileg nga anginna, wen, dagiti gayang iti ali-pugpog, wen, no amin dagiti uraro ken nabileg a bagyona sumaplit kadakayo, awanto ti bilegna kadakayo a mangirarem iti taaw ni ladingit ken awan inggana a kinaay-ay-ay, gapu iti bato a binangonyo, nga awan duadua a pamuon, ti pamuon a no bangonen dagiti tao saanda a matuang” (Helaman 5:12).

Ti Pateg dagiti Natibker ti Pannakailansadna nga Angkla

Ti biag ket addaan iti wagas a pangsubok kadagiti angklatayo ken pangsulisog kadatayo tapno mayanud. Nupay kasta, no dagiti angklatayo ket nasayaat ti panna-kaipanda iti bato ti Mannubbottayo, agtalinaeddanto—kasano man ti pigsa ti angin, ti dawel ti danum, wenno ti kangato dagiti dalluyon.

Kinaagpaysona, ti babor ket saan a naaramid tapno agtalinaed a di aggargaraw iti pagsanglidan ngem ketdi tapno mangyaon iti angkla ket aglayag kadagiti taaw ti biag. Ngem dayta ket maysa a pangngarig para iti sabali a panawen.

Iti daytoy a panawen, maliwliwaak iti pannakaam-mok a ti angkla ti ebanghelio ken ti bato ti Mannubbottayo ti mamagtalinaedto kadatayo a natibker ken natalged.

Ti kasta nga angkla ti mamagtalinaedto kadatayo manipud iti pannakayanud nga agturong iti peggad ken kinadaksanggasat. Daytoy ti mangyegto kadatayo itingayed a gundaway tapno makapagrag-o kadagiti awan pakayaspinganna a kinapintas ti kanayon nga agbaliw ken makaparegta a buya ti biag.

Napintas ken napateg ti panagbiag. Mabalin a sulisogendatayo dagiti angin, bagyo, ken dagiti agdama nga agos tapno mayanud nga agturong kadagiti makita ken di makita a pagpeggadan, ngem ti mensahe ti ebanghelio ken ti nadiosan a bilegna ti mamagtalinaedto kadatayo iti dalan nga agturong iti natalged a pagsanglidan ti Nailangitan nga Amatayo.

Ngarud, saantayo laeng a *dumngeg* kadagiti bitla ti sapasap a komperensia iti Abril ngem ketdi *yaplikartayo* pay dagiti mensaheda a kas iti natibker ti pannakailansadna nga angkla kadagiti inaldaw a panagbiagtayo.

Sapay koma ta bendisionan ken tarabayennatayo ti Dios iti daytoy napateg ken kasapulan unay a panagkagumaan!

PANANGISURO MANIPUD ITI DAYTOY A MENSAHE

Ibilang ti panangilawlawag iti kinapateg dagiti angkla iti konteksto ti familia ni Lehi a naglayag a nagturong iti naikari a daga (kitaen iti 1 Nephi 18). Mabalinmo nga isuro ti 1 Nephi 18:11–15, ti maysa a

panawen a pannakapungo ni Nephi, ti panagsardeng ti Liahona nga agandar, ken ti pannakapasanud ti bapor iti naranggas a bagyo. Ania dagiti pagbanagan a paka-ipasanguantayo no saantayo a sitatalged a nakaangkla iti ebanghelio? Mabalimo pay nga isuro ti 1 Nephi 18:21–22 ken ilawlawag no kasano a makasaraktayo iti talged babaen ti panagkiddawtayo iti Mangisalakan.

AGTUTUBO

Ti Komperensia ken Siak

Ni Sarah Deeks

Impapanko idi a ti panawen ti sapaap a komperensia ket atiddog ken makakettang, ngem iti panaglabas ti panawen, nasursurok nga ipateg ken pasungadan daytoy. Ti panawen ti komperensia ket mabalim a makapapigsa iti espiritu, ngem nalaka nga agpukaw dagitoy a rikna no agtultuloy ti gagangay a panagbiag iti Lunes. Sumagmamano kadagiti sumaganad a kapanunotan ti nakatulong kaniak nga agtultuloy a makagun-od iti mabalim a gun-oden manipud iti komperensia.

Isaganak ti bagik para iti komperensia babaen ti panagsurat kadagiti saludsod, ket kalpasanna isuratko dagiti pakaammo a mangsungbat kadagiti saludsodko. Kalpasanna, idownloadko dagiti bitla ken musika ti komperensia LDS.org ket ikabilko ida iti MP3 player tapno mangngagak iti maysa a bitla wenno himno bayat ti panangasikasok kadagiti inaldaw nga aramidko. Kaay-ayok pay ti agadal iti isyu ti komperensia

ti *Liahona* Markaak ken suratak dagiti mardiyin ti bukodko a kopia. Iti panawen nga asidegen ti sumaruno a komperensia, nausaren a naimbag ti magasin. No dadduma sangkamaysa nga adalen ti familiak dagiti mensahe iti family home evening.

Ti panangpatalinaed iti espiritu a nariknatayo kabayatan ti komperensia ken panagtultuloy a panagadal manipud kadagiti bitla ket agkasapulan iti panangitrahaho, ngem ti panangaramid iti daytoy ket dakkel a bendision para kaniak. Nakaawatak iti dakkel a pigsa ken pannarabay kadagiti panawen ti panagkasapulan babaen ti panangadalko kadagiti bitla manipud iti sapaap a komperensia, ken ammok a naparegta dagitoy a bitla.

Ti nagsurat ken agnanaed iti Toronto, Canada.

ANNAK

Ilansadmo ti Angklam

Ania ti mamagtalinaedto kenka a siaangkla iti ebanghelio? Mabalim a kayatmo ti mangidrowing iti ladawan ti maysa a bapor ken maysa nga angkla. Kalpasanna mabalimmo ti mangipigket iti abay ti angklam iti ania man a ladawan dagiti tao wenno bambanag a makatulong iti bapormo nga agtalinaed a natalged. Laglagipen a kinuna ni Presidente Uchdorf a ni Jesucristo, dagiti moderno a propeta, ken dagiti nasantuan a kasuratan ket dagiti kasayaatan nga angkla para kadagiti biagtayo.



Ti Nadiosan a Mision ni Jesucristo: Mangisalakan ken Mannubbot

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano a ti pannakaawatyo iti biag ken mision ti Mangisalakan ket mangpapigsa iti pammatiyo Kenkuana ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Pammati, Pamilia, Tulong

Daytoy ket paset ti maysa a serye dagiti Mensahe iti Visiting Teaching a mangitampok kadagiti aspekto ti mision ti Mangisalakan.

Maysa kadagiti kapatgan a pangiladawan a titulo ni Jesucristo ket Mannubbot,” kinuna ni Elder D. Todd Christofferson ti Korum dagiti Sangapulo-ket-dua nga Apostol. “Ti *mangsubbot* kaipapananna ti mangbayad iti obligasion wenno utang. Ti *mangsubbot* kaipapananna pay ti umarayat wenno mangwayawaya babaen ti panagbayad iti pangsaka. . . . Tunggal maysa kadagitoy a kaipapanan ti mangisingasing iti agduduma nga aspekto ti naindaklan a Pannakasubbot nga impatungpal ni Jesucristo babaen ti Pannubbotna, a pakairamanan ti, kadagiti balikas ti diksionario, ‘mangispal manipud iti basol ken dagiti pannusana, babaen ti naaramid a sakripisio para iti nagbasol.’”¹

Kinuna ni Linda K. Burton, saspasap a presidente ti Relief Society: “Ti Nailangitan nga Ama . . . imbanna ti Bugbugtong ken naan-anay nga Anakna tapno agsagaba para kadagiti basbasoltayo, dagiti pagledleddaangantayo, ken amin a kasla saan a nalinteg kadagiti bukodtayo a panagbiag.

“ . . . Maysa a babai a masubsubok ken malmaldaangan iti adun a tawen ti agsangsangit a nagkuna, ‘Nautobko a kaslaak la maysa a daan a 20 a doliar a papel de bangko—nagelgel, napigis, narugit, naabusu, ken nagaradgadan. Ngem . . . aggatadak pay laeng iti nabukel a 20 a doliar.’ Ammo daytoy a babai nga isu . . . ket naan-anay ti pateгна iti [Dios] a nangibaon iti Anakna a mannubbot para kenkuana, para iti tunggal maysa. Tunggal maysa a kabsat a babai iti Simbaan ket nasken nga ammona no ania ti ammo daytoy a babai.”²

Manipud kadagiti Nasantuan a Kasuratan

2 Nephi 2:6; Helaman 5:11–12; Moises 1:39

Manipud iti Pakasaritaantayo

Iraman ti Baro a Tulag dagiti pakasaritaan dagiti babbai a nangaramat iti pammati ken ni Jesucristo, nangadal ken nangipakat kadagiti pannursurona, ken nagpaneknek maipapan iti panagserbina, dagiti milagro, ken kinatan-okna.

Kinuna ni Jesus iti babai iti bubon: “Siasino man nga uminom iti danum nga itdekto kenkuana, uray

kaano saanto a mawawen; no di ket ti danum nga itdekto kenkuana agbalinto kenkuana nga ubbog ti danum nga agburayok a maipaay iti biag nga agnanayon.

“Ti babai kinunana kenkuana, Apo, itedmo kaniak daytoy a danum tapno saanak a mawaw. . . .

“Ammok a [ti Mesias] umay, . . . : inton isuna umay, ipalawagnanto kadatayo dagiti amin a banag.

“Kinuna ni Jesus kenkuana, Siak met laeng a makisasao kenka.”

Isu ket “pinanawanna ti karambana” ken nagpaneknek maipapan Kenkuana iti siudad. (Kitaen iti Juan 4:6–30.)

DAGITI NAGADAWAN

1. D. Todd Christofferson, “Redemption,” *Ensign* wenno *Liahona*, Mayo 2013, 109.
2. Linda K. Burton, “Is Faith in the Atonement of Jesus Christ Written in Our Hearts?” *Ensign* wenno *Liahona*, Nob. 2012, 114.

Ania ti Maaramidko?

1. Kasano a maipakitayo ti panagyaman iti Mangisalakan ken Mannubbot a ni Jesucristo?
2. Kasano a makiranudtayo kadagiti bendision ti pannubbot a sakripisio ti Mangisalakan iti panagbiagtayo?